



Durkum, 19 april 2021

Stimuleringsfonds Nedersaksisch

Pot met geld veur Gelderse streektaalprojecten

'n Book uutbrengen of toneelstuk spöllen in 't plat, 'n muziekveurstelling of laezing geven in de streektaal of 'n ander plan of project waarbi-j 't gebruik en behold van 't Nedersaksisch wodt e-stimuleert? Daorveur köj noo subsidie aanvraogen bi-j 't Arfgoedcentrum Achterhook en Liemers. 't Geld wodt beschikbaar esteld deur de Provincie Gelderland.

't Arfgoedcentrum Achterhook en Liemers hölt zich dit joar extra bezig met 't onder de andach brengen en hollen van de streektaal en streekeigen karakter. Dat is meugelek deur 'n financiële bi-jdraege van de provincie Gelderland. Ni-j is dat 't Arfgoedcentrum alle Gelderse regio's waar Nedersaksisch wodt esproken, geet bedenene. Naost de Achterhook is dat ok de noordoost Veluwe. Der bunt al prachtege projecten, denk maor an onderwiesproject Wiesneus, muziekfestival Plat Gespöld en 't Achterhook College. Met de steun van de Provincie könt nog völle meer mooie plannen wodden e-realiseerd, zoas 't stimuleren van plat praoten onder zorgmetwarkers.

Stimuleringsfonds

Der is ok 'n subsidiepot van viefentwintigduuzend euro beschikbaar veur kleine lokale en regionale initiatieven dee bi-jdraegt an 't gebruik en behold van 't Nedersaksisch in Gelderland. Da's belangriek, want de streektaal, in al zien varianten, is neet alleneg nauw verbonden an 'n streek, maor ok an de gebruiken en gewontes van de luu die der wont. 't Mek deel uut van de eigen identiteit. Projecten en activiteiten dee te maken hebt met de Nedersaksische streektaal zoas den in Gelderland wodt esproken (Achterhooks en noordoost Veluws) könt wodden an-emeld bi-j 't Arfgoedcentrum Achterhook en Liemers. Der is maximaal viefduuzend euro per project beschikbaar.

Nedersaksisch

In Gelderland bunt twee regio's waar Nedersaksisch wodt esproken: de Achterhook en noordoost Veluwe. 't Nedersaksisch taalgebied is völle groter: 't beslöt ok Grönningen, de Stellingwarven, Drenthe, Urk, Twente, Salland en löp aover de grenze wieter in Duutslan. Elke streek hef zien eigen taalvariant, maor der bunt ok aovereenkomsten. Denk maor an naoberschap en 't umkieken naor mekare, de mentaliteit van anpakken en doo maor normaal, dan doo'j al gek genog. In 2018 wier 't Nedersaksisch 'n officieel erkende taal. In het *Convenant inzake de Nederlandse erkenning van de regionale Nedersaksische taal* praotten de betrokken provincies met mekare af um der alles an te doon um 't Nedersaksisch te behollen en 't gebruik dervan te stimuleren.

Arfgoedcentrum Achterhook en Liemers zet zich in voor streektaal en –cultuur. Meer wetten aover streektaal in Gelderland? Kiek 's op www.ecal.nu. Op www.ecal.nu/stimuleringsfonds-streektaal köj meer vinden aover 't Stimuleringsfonds Nedersaksisch Gelderland. Hier staot ok de veurwaarden um subsidie an te vraogen.

Noot voor de redactie: Wietere informatie köj opvraogen bi-j streektaalfunctionaris Marije Stomps, m.stomps@ecal.nu of 06-52091081.